

# NE'MA AQÛB

## Pêşgotin

Ne'ma Aqûb tê bêjî mîna berevokê ye, ya ku bona wan endemêd civîna<sup>f</sup> Xwedê ye, k'îjan ku t'emamiya dinyayêda belabûyî ne (1:1). Li gora şe'dêd sedsalîyêd pêşinda xudanê vê ne'mê Aqûbê<sup>f</sup> birê Îsa Mesîh e (Metta 13:55; Marqos 6:3) û serwêrekî civîna Orşelîmêda<sup>f</sup> bû (K'arêd Şandîya 12:17; 15:13; 21:18; Korint'î I, 15:7; Galatî 1:19; 2:9). Ew bi xeberêd qewat û meselêd bedew r'ê dide ber bawermenda, wekî bikarîbin bi serwaxtî<sup>f</sup> nava e'mirekî r'astda bijîn. Ew ser çend pîrsa disekine, awa gotî ser dewletîyê û feqîrîyê, cêr'ibandinê<sup>f</sup>, jîyîna pîroz<sup>f</sup>, firqîkirinê, bawerîyê<sup>f</sup> û kirinêd wê, usa jî derheqa zêdezimanîyê, serwaxtîyê, ser'-de'wa, k'ubarîyê û milûktîyê, xeybê û lomek'arîyê<sup>f</sup>, sebirê û dua.

Vê ne'mêda ew giranîyê dide ser vê yekê, wekî jîyîna mesîhîyêda<sup>f</sup> gerekê hin bawerî hebe, hin jî kir. Dil dide, wekî nava cefa û tengasîyada<sup>f</sup> sebir kin, qewata duakirinêda bawer bin û bi r'uh'anî alî hev bikin.

## Serecema fikira ne'mê

Pêşgotin (1:1)

Bawerî û serwaxtî (1:2-8)

Feqîrî û dewletî (1:9-11)

K'etin-r'abûn (1:12-18)

Bibihên û biqedînin (1:19-27)

Bona firqîkirinê (2:1-13)

Bawerî û kirin (2:14-26)

Bawermend û zimanê wî (3:1-18)

Bawermend û dinya (4:1-5:6)

Şîretêd cûr'e-cûr'e (5:7-20)

**Silavkirin**

**1** <sup>1</sup>Ji Aqûbê<sup>f</sup> xulamê Xwedê û Xudan<sup>f</sup> Îsa Mesîh:

Silav li we her donzdeh e'şîrêd dinyayêda\* belabûyî be.

**Bawerî<sup>f</sup> û serwaxtî<sup>f</sup>**

<sup>2</sup>Xûşk-birayêd min, şabûneke mezin h'esab kin, gava hûn bik'e-vine nava cûr'e-cûr'e cêr'ibandina.

<sup>3</sup>Fe'mdarî ye, ku cêr'ibandina bawerîya<sup>f</sup> we sebirê pêşda tîne. <sup>4</sup>Û sebir jî, bira bi dûmika dirêj be, wekî hûn k'amil û gihîştî bin, t'u kêmasîke we t'unebe. <sup>5</sup>Heger serwaxtîya<sup>f</sup> yekî ji we t'êra wî nake, bira hîvî ji Xwedê bike û wê ji wîr'a bê dayîne. Ew bi mer'danî dide h'emûya û t'u kesî bêqedir nake. <sup>6</sup>Lê t'enê bira bi bawerîyê<sup>f</sup> bixwaze û dudilî nebe, çimkî yê dudilî mîna pêlêd be'rê ye ku ji bayê bilind dibin û datînin. <sup>7</sup>Merivê<sup>f</sup> usa bira nefikire, ku wê tiştêkî ji Xudan bistîne. <sup>8</sup>Ew merivê ku ser du niga dikule, h'e-mû gavêd xweda ne ser ya xwe ye.

**Feqîr û dewletî**

<sup>9</sup>Birayê belengaz bira ser bilindbûna xwe bifir'e, <sup>10</sup>lê yê dewletî

ser nimizbûna xwe, çimkî ewê mîna gulêd gîhê h'işk be her'e\*.

<sup>11</sup>Çawa te'v bi germayîya xweva dertê gîhê h'işk dike, gul jê diwarin û bedewetîya dîndara wê jî unda dibe, usa jî yê dewletî wê îşê xweda biç'ilmise her'e.

**K'etin-r'abûn**

<sup>12</sup>Xwezî li wî merivî, ku cêr'ibandinada teyax dike, çimkî gava bi cêr'ibandinê r'ûspî derê, ewê t'acêf jîyînê bistîne, k'ijan ku Xwedê wanr'a soz daye, yêd ku Wî h'iz dikin. <sup>13</sup>Bira t'u kes, yê ku nava cêr'ibandinêda ye, nebêje: «Xwedê min bi xirabîyê dicêr'ibîne», çimkî Xwedê xirabîyada nayê cêr'ibandinê û ne jî yekî dicêr'ibîne. <sup>14</sup>Lê her kes dibe maşoqê dilhavijîyêd xwe, dixape û tê cêr'ibandinê. <sup>15</sup>Hingê dilhavijî kelê xwe distîne, gune<sup>f</sup> jê difirike û gune jî ku mezin dibe, mirin jê dibe.

<sup>16</sup>Nexapin xûşk-birayêd mine delal! <sup>17</sup>Her dayîna qenc û her p'êşk'êşa<sup>f</sup> k'amil ji jor e, ji Bav<sup>f</sup>, ji E'firandarê r'onaya tê xwarê, Yê ku ne Xwexa tê guhastinê, ne jî sî ber Wî dadiger'e. <sup>18</sup>Ewî li gora

\* <sup>1:1</sup> Bi gotineke din: «Donzdeh e'şîrêd Îsraêlê<sup>f</sup>».

\* <sup>1:10</sup> Îşaya 40:6-7.

qirara Xwe em bi xebera r'astîyê ji Xwe dinê xistin, wekî em bibine awazekî berêd<sup>f</sup> deremeta pêşîne e'firînêd Wî.

### Bibihên û biqedînin

<sup>19</sup>Zanibin\*, xûşk-birayêd mine delal, bira her meriv bihîstinêda serxwe be, lê xeberdan û hêrs-k'etinêda giran be, <sup>20</sup>çimkî hêrsa mêriv heqîya Xwedê nayne sêrî<sup>f</sup>\*. <sup>21</sup>Lema h'emû mir'dar'îyê û her xirabîyê ji xwe dûr xin, bi milûk-tîyê wê xebera nava weda çandî qebûl kin, ya ku dikare r'uh'ê we xilaz<sup>f</sup> ke.

<sup>22</sup>Xeberê biqedînin, ne ku t'e-nê bibihên û usa xwe bixapînin. <sup>23</sup>Heger yek xeberê t'enê dibihê û naqedîne, ew mîna wî merivî ye, yê ku neynikêda r'eng-r'ûyê xwe dinihêr'e. <sup>24</sup>Xwe dibîne, derbaz dibe diçe û zû bîr dike, ku ew yekî çawa bû. <sup>25</sup>Lê ewê ku ç'e'-vê xwe ji qanûna k'amile ku aza dike nabir'e û nava wêda dimîne, dibihê bîr nake, lê diqedîne, ew wan kirinêd xweda xwezilî ye.

<sup>26</sup>Heger yek xwe xwedênas h'e-sab dike û zimanê xwe nikare, ew

xwexa xwe dixapîne, xwedênasîya wî p'ûç' e. <sup>27</sup>Li ber Bav Xwedêyê me xwedênasîya r'ast û bêqusûr ev e: Te'li-tengîyada dest bavêjine sêwîya<sup>f</sup> û jinebîya û h'evza xwe jî ji lek'êd dinê bike.

### Firqîyê nekine nava meriva

**2** <sup>1</sup>Xûşk-birayêd min! Hûn ku bawermendêd Xudanê me Îsa Mesîhê xweyîr'ûmet in, firqîyê nekine nava meriva. <sup>2</sup>Mesele, gava yekî gustîla zêr' t'ilîyêda û k'incêd r'ewş wergirtî bê civîna<sup>f</sup> we, usa jî yekî belengaz bi k'incêd p'izinîva bê <sup>3</sup>û hûn dîna xwe bidine yê xweyê k'incêd r'ewş û bêjinê: «K'erem ke vê jorê r'ûnê», lê yê belengazr'a bêjin: «Ser p'îya bisekine» yan jî «vê jêrê r'ûnê», <sup>4</sup>gelo hûn nava xweda firqîyê danaynin û nabine h'akimêd fikirêd xirab?

<sup>5</sup>Bibihên xûşk-birayêd mine delal! Ne Xwedê belengazêd vê dinê bijartin, wekî bi bawerîyê dewletî bin û warêd wê P'adşatîyê bin, k'îjan ku Xwedê wanr'a soz daye, yêd ku Wî h'iz dikin? <sup>6</sup>Lê hûn belengaza bêhurmet dikin!

\* <sup>1:19</sup> Nav hinek destnivîsarada dewsa «zanibin» xebera «awa» heye.

\* <sup>1:20</sup> Aha jî tê fe'mkirinê: «Çimkî hêrsa mêriv nahêle ku meriv li ber Xwedê r'ast bijî».

Çima ew yêd dewletî nînin, ku zorê li we dikin û we k'aşî ber dîwanê dikin? <sup>7</sup> Çima ew nînin, yêd ku wî navê qenc bêhurmet dikin, k'îjan ser we ye?

<sup>8</sup> Heger hûn qanûna P'adşatîyê biqedînin, li gora nivîsara ku dibêje: «Hevalê xwe weke xwe h'iz bike»\*, hûn qenc dikin. <sup>9</sup> Lê heger hûn firqîyê dikin, guna dikin û hindava Qanûnêda dibine yekî gunek'ar<sup>f</sup>. <sup>10</sup> Ewê ku t'emamîya Qanûnê xwey dike, lê tişteki jê ber'dide, ew dibê deyndarê t'emamîya Qanûnê. <sup>11</sup> Çimkî Ewê ku got: «Zinîyê neke»\* usa jî got: «Nekuje»\*\*. Awa heger zinîyê nekî, lê bikujî, dîsa Qanûnê dit'er'ibînî. <sup>12</sup> Xeberdan û kirinêd xweda usa bin, çawa yêd dîwana wanê bi wê qanûnê bibe, ya ku azayîyê dide. <sup>13</sup> Çimkî bê r'e'm wê dîwana bê-r'e'ma bibe, lê r'e'm li ber dîwanê r'ûspî dike\*.

### Bawerî û kirin

<sup>14</sup> Çi feyde xûşk-birayêd min, heger yek bêje ku bawerîya wî

heye, lê kirêd wî t'unebin? Gelo eva bawerîya dikare wî xilaz ke? <sup>15</sup> Mesele, heger birak yan xûşkek sit'ar lê t'unebe yan h'ewcê nanê r'oje be, <sup>16</sup> jî we yek wan'r'a bêje: «Bi xêr û silamet her'in, germ û t'êr bin», lê tiştêd ku ew h'ewce bin nede wan, çi feyde? <sup>17</sup> Usa jî bawerî, heger kirêd wê t'unebin, bi t'enê mirî ye.

<sup>18</sup> Lê yekê bêje: «Bawerîya te heye, kirêd min hene». Lê ezê bêjim: K'a bawerîya xwe bê kirina nîşanî min ke, ezê jî bawerîyê bi kirinêd xweva nîşanî te kim. <sup>19</sup> Tu bawer dikî, ku Xwedê yek e. Qenc e! cin<sup>f</sup> jî bawer dikin û dibizdin. <sup>20</sup> Lê tu dixwazî ev yek bê îzbatkirinê, merivê bêh'iş, wekî bawerî bêyî kira mirî ye? <sup>21</sup> Ne Birahîmê<sup>f</sup> bavê me bi kira r'ast hate h'esabê, gava kur'ê xwe Îshaq<sup>f</sup> danî ser gorîgehê<sup>f</sup>, ku bike qurban<sup>f</sup>?\* <sup>22</sup> Tu dibînî ku bawerîyê t'evî kirêd wî ya xwe kir û bi wan kira bawerî k'amil bû? <sup>23</sup> Û gotina nivîsarê hate sêrî, ku dibêje: «Biraîm Xwedê bawer kir

\* 2:8 Qanûna K'ahîntîyê 19:18.

\* 2:11 Derk'etin 20:14; Qanûna Ducarî 5:18.

\*\* 2:11 Derk'etin 20:13; Qanûna Ducarî 5:17.

\* 2:13 Bi yûnanî xeber bi xeber aha ye: «R'e'm ser dîwanê dik'eve».

\* 2:21 Destpêbûn 22:1-14.

û ew jêr'a r'astî hate h'esabê»\* û dostê Xwedê hate gotinê\*\*. <sup>24</sup>Hûn dibînin ku meriv bi kira r'ast tê h'esabê, ne ku t'enê bi bawerîyê?

<sup>25</sup>Ne usa jî R'exabaf ç'e'vderf bi kira r'ast hate h'esabê, gava ce'-sûs qebûl kirin û ew r'êke dinva ver'êkirin?\*

<sup>26</sup>Awa çawa qalib bê r'uh' mirî ye, usa jî bawerî bêyî kira mirî ye.

### Ziman

**3** <sup>1</sup>Bira gelek ji we, birayêd min nebine dersdar, çimkî hûn zanin dîwanê ser me dersdara hê giran be. <sup>2</sup>Belê em h'emû jî gelekî şaşîya dikin. Heger yek xeberdanêda t'u şaşîyê nake, ew yekî k'amil e, ku dikare t'emamîya qalibê xwe zeft ke. <sup>3</sup>Em gemê davêjine devê hespê, wekî ew bê zeftê, ku em serwêrtîyê t'emamîya hespê pêva bikin. <sup>4</sup>Em bînin ser gemîyê jî. Ew çiqasî mezin in û ji ber bayê qayîm têne ajotinê, lê bi çerxeke gelekî biç'ûk têne serwêrtîkirinê, dilê gemîvanf k'îyalîda ku bixwaze. <sup>5</sup>Usa jî ziman endemekî biç'ûk e, lê tiştêd ji xwe mestir dibêje. Dîna xwe bidine pirîske

agir, çî daristaneke mezin dikare bişewitîne! <sup>6</sup>Ziman jî agirek e, dinyake zulmk'ar e nava endemêd meda. Ew t'emamîya qalibê me dih'er'imîne, agir dewra jîyîna mêriv dixe û ew xwexa ji alava agirê dojêf pêgirtî ye. <sup>7</sup>Her cûr'e r'e'wir, teyrede, şûlikî û h'eywanêd be'rê têne zeftê û zeftî mêriv dibin, <sup>8</sup>lê t'u qûl-bende zimên nikare. Ew zulmk'arekî bêar e, je'ra me'rava dagirtî ye. <sup>9</sup>Em bi wî şikîrîyê didine Xudan û Bav, bi wî jî nifîr'a mêriv dikin, yêd ku dilqê Xwedêda hatine xuliqandinê. <sup>10</sup>Hema ji wî devî jî dua û nifîr' dertên. Xûşk-birayêd min, ev yek ne cayîz e ku aha be. <sup>11</sup>Gelo ji ç'e'vkanîkê ava xweş û te'l dide der? <sup>12</sup>Gelo dibe xûşk-birayêd min, wekî dara hêjîrê berê zeyt'û-nê bide, yan jî k'ola tirîyê hêjîrê? Ne jî ji şor'ayîyê ava xweş dertê?

### Serwaxtîya dinyayê û serwaxtîya e'zmên

<sup>13</sup>Nava weda k'î serwaxt û aqil e? Bira ew bi p'ergalîya xweye qenc, kirêd xwe bi milûktîya serwaxtîyê bide k'îfşê. <sup>14</sup>Lê heger dilê weda

\* <sup>2:23</sup> Destpêbûn 15:6.

\*\* <sup>2:23</sup> R'omayî 4:3; Galatî 3:6.

\* <sup>2:25</sup> Yêşû 2:1-21; 6:22-25.

h'evsûdîya xirab û ç'e'vnebarî hene, k'ubar nebin û r'astîyê derew dernexin. <sup>15</sup> Eva «serwaxtîya» ne dayîna jorin e, lê ji dinê ye, ya merivayî ye û ji cina ye. <sup>16</sup> Çimkî li k'îderê h'evsûdî û ç'e'vnebarî hene, li wir bêt'erbetî û her kirinêd xirab jî hene. <sup>17</sup> Lê serwaxtîya jorin, berê pêşin paqij e, paşê e'dil e, milûk û berbihêr e, bi r'e'mê û berêd qencîyêva t'ijî ye, bê t'agêr<sup>f</sup> û bê h'ilek'arî ye. <sup>18</sup> Û berê heqîyê ji alîyê yê ku bi e'dilayîyê diçîne tê çînînê\*.

#### Yarê dinê, neyarê Xwedê

**4** <sup>1</sup> Ji k'u ne ew şer' û de'wê nava weda? Ne ji temêd we ne, ku nava dilê weda şer'ê xwe dikin? <sup>2</sup> Ç'e'vê we li tiştaya ye, lê nak'êve destê we, dikujin û ç'e'vnebarîyê dikin, lê nikarin bigihîjine meremê xwe, hingê hûn hev'r'a dik'evine h'ucetê û şer' dikin\*. Hûn dest naxin, çimkî hûn hîvî jî Xwedê nakin. <sup>3</sup> Û gava hîvî dikin, nastînin, çimkî ser nêta xirabîyê

hîvî dikin, wekî k'êfêd dilê xwe derbaz kin. <sup>4</sup> Bêe'silno! Hûn nizanin k'ê vê dinê h'iz dike, ew neyartîyê li Xwedê dike? Awa k'î dixwaze bibe yarê dinê, ew xwe dike neyarê Xwedê. <sup>5</sup> Yan t'exmîna we badîhewa<sup>f</sup> nivîsar dibêje, ku Xwedê demana wî r'uh'ê ber meda ye?\* <sup>6</sup> Lê belê ew hê k'eremê<sup>f</sup> dide me. Lema nivîsar dibêje:

«Xwedê miqabilî k'ubar-babaxa ye,

lê k'eremê dide şkestîya\*».

<sup>7</sup> Awa ber Xwedê şkestî bin. Miqabilî mîrêcin<sup>f</sup> bisekinin û ewê jî we bir'êve. <sup>8</sup> Xwe li Xwedê bigirin, Xwedê jî wê Xwe li we bigire. Destêd xwe bişon, gunek'arno, dilê xwe paqij kin, dudilîno. <sup>9</sup> Bine'lin, şîn û girî bin, bira k'enê we bibe şîn û eşqa we jî k'eder. <sup>10</sup> Li ber Xudan xwe bişkênin û Ewê we bilind ke.

#### Xeyba birê xwe neke

<sup>11</sup> Xeyba hevdu nekin xûşk-birano. K'î xeyba birê xwe dike, yan loma birê xwe dike, ew xeyba

\* <sup>3:18</sup> Aha jî tê fe'mkirinê: «Û heqî ew ber e, ku yê e'dil t'oximê e'dilayîyê diçîne».

\* <sup>4:2</sup> Aha jî tê fe'mkirinê: «Ç'e'vê we li tiştaya ye, lê nak'êve destê we û dibine mêrkuj. Hûn ç'e'vnebarîyê dikin, lê nikarin bigihîjine meremê xwe, hingê dik'evine h'ucetê û şer' dikin».

\* <sup>4:5</sup> Aha jî tê fe'mkirinê: «Ku ew r'uh'ê ber bîna me ç'e'vnebarîyêda ye».

\* <sup>4:6</sup> Gotinêd Silêman 3:34.

Qanûnê dîke û loma Qanûnê dîke. Lê heger tu loma Qanûnê dikî, îdî tu Qanûnê naqedînî, lê h'akimê wê yî. <sup>12</sup>T'enê Qanûndarek û H'akimek heye, ku dikare hin xilaz ke û hin jî unda ke. Lê tu k'î yî ku loma hevalê xwe dikî?

### H'evza xwe ji k'ubarîyê bikin

<sup>13</sup>Niha hûn guhdar bin, yêd ku dibêjin: «Îro yan sibê emê her'ine filan bajarî û li wê derê salekê bimînin, t'ucaretîyê<sup>f</sup> bikin û qazinc kin». <sup>14</sup>Hûn nizanin wê sibê çi bê serê we. E'mirê we çi ye? Hûn mîna mijê ne, hew dinihêr'î heye, hew dinihêr'î t'une.\* <sup>15</sup>Gerekê hûn aha bêjin: «Heger Xudan bixwaze, emê bijîn û filan yan bêvan tiştî bikin». <sup>16</sup>Lê hûn bi k'ubar-babaxîya xwe difir'in. Her p'eydayîneke aha xirabî ye. <sup>17</sup>Awa ewê ku zane qencîyê bike û nake, ew jêr'a gune ye.

### Bona dewletîya

**5** <sup>1</sup>Niha hûn bibihên, dewletîno! Bigirîn û şînê bikin bona wê belengazîya ku wê bê serê we. <sup>2</sup>Hebûka<sup>f</sup> we r'izî ye, k'incêd we

jî bûne xurê bizûzê.\* <sup>3</sup>Zêr' û zîvê we zeng girtin e û zenga wanê bibe şe'dê miqabilî we û mîna alava êgir goştê we h'ûfî xwe ke. We bona r'ojêd axirîyê xizne xwer'a t'op kir! <sup>4</sup>We ew heqêd p'alêd ku e'rdê we didirûtin nedanê. Va ye ew heq dikine zarîn. Şikîyatê<sup>f</sup> wan p'ala gihîştîye guhê Xudanê Zor\*. <sup>5</sup>We li ser dinê ç'e'vê xwe tiştekiîda nehiştîye, li gora dilê xwe xwarîye-vexwarîye, çawa k'ozîkirî<sup>f</sup>, bona r'oja serjêkirinê. <sup>6</sup>We ew merivêd r'ast lomek'ar<sup>f</sup> kirin û kuştin, k'îjan ku miqabilî we r'anebûn.

### Sebir û dua

<sup>7</sup>Awa xûşk-birano, sebir kin h'eta hatina Xudan. Dîna xwe bidinê, cotk'ar hîvîya berê e'rdêyî bi qîmet e, bona wê yekê sebir dîke h'eta barana pêşin û paşin lêde. <sup>8</sup>Hûn jî sebir kin, gumana xwe unda nekin, çimkî hatina Xudan nêzîk e. <sup>9</sup>Bîna xwe ji hevdu teng nekin xûşk-birano, ku dîwana we nebe. Va ye h'akim pişt dêrî sekinî ye. <sup>10</sup>Xûşk-birano, alîyê te'lî-tengîya û sebirêda ç'e'v bidine wan

\* <sup>4</sup>14 Gotinêd Silêman 27:1.

\* <sup>5</sup>2-3 Metta 6:19.

\* <sup>5</sup>4 Qanûna Ducarî 24:14-15.

p'êxembera, yêd ku bi navê Xudan xeber dane. <sup>11</sup> Belê em xwezîya xwe li yêd sebir dikin tînin. We bona sebira Îbo bihîstîye û we dît, Xudan axirîya wî çawa xêr kir, çimkî Xudan gelekî îsaf<sup>f</sup> û r'e'm e!\*

<sup>12</sup> Berî her tiştî xûşk-birayêd min, sond nexwin, ne bi e'zmên, ne bi e'rdê, ne jî sondeke mayîn. Bira «Belê»-ya we belê be, «Na»-ya we na be, wekî hûn dîwanê ser xweda neynin\*.

<sup>13</sup> Heger yek ji we te'li-tengîyêda ye, bira dua bike. Heger yek şa ye, bira eşqî Xwedê bistirê. <sup>14</sup> Heger yek ji we nexweş e, bira gazî berpirsîyarêd civînê ke, ser wîda bira dua bikin, bi navê Xudan bi r'ûn<sup>f</sup> r'ûn kin\*. <sup>15</sup> Û duayê bi bawerîyê

wê yê nexweş qenc ke û Xudan wê wî r'ake ser p'îya. Û heger gunek jî kiribe, wê wî bê baxşandîne. <sup>16</sup> Lema ber hev gunêd xwe bidine r'ûyê xwe û bona hev dua bikin, wekî hûn qenc bin. Duayê yê r'ast gelekî qewat e û h'ukum dike. <sup>17</sup> Êlyas<sup>f</sup> xût merivekî mîna me bû, bi dil û can dua kir, ku baran nebare û sê sal û nîva ser e'rdê baran nebarî\*. <sup>18</sup> Û paşê dîsa dua kir, ji e'zmên baran barî û e'rdê berê xwe da.

<sup>19</sup> Gelfî xûşk-birayêd min! Heger yek ji we ji r'îya r'astîyê bik'eve û yekî din wî veger'îne, <sup>20</sup> bira ew zanibe yê ku gunek'ar ji r'îya wîye xalifî<sup>f</sup> vediger'îne, ew r'uh'ekî ji mirinê xilaz dike û gelek guna r'esît dike\*.

\* 5:11 Îbo 1:1-22; 2:10; 42:10-17; Zebûr 103:8.

\* 5:12 Metta 5:34-37.

\* 5:14 Marqos 6:13.

\* 5:17 P'adşatî III, 17:1; 18:1; 18:41-45.

\* 5:20 Petrûs I, 4:8.